

Tabell C-k

Saker med særskild fordeling. Kommunane.

Følgjande saker er gitt ei særskild fordeling innanfor innbyggjartilskotet i 2017:

Kol.	Sak	Departement	Beløp i 1000 kr
1	Inndelingstilskot	KMD	129 756
2	Trekk Nannestad og Ullensaker	KMD	-19 350
3	Helsestasjons- og skulehelseteneste	HOD	734 388
4	Utdanning av deltidsbrannpersonell	JD	38 919
5	Utrekk avgiftslette differensiert arbeidsgjevaravgift	KMD	-168 049
6	Korreksjon kommunal medfinansiering statleg barnevern	BLD	-27 382
7	Forsøk med ny oppgåve- og ansvarsdeling i barnevernet	BLD	73 345
8	Uttrekk forsøk statleg finansiering omsorgstenestene	HOD/KMD	-1 015 378
9	Frivilligsentraler	KUD	150 986
10	SUM		-102 764

Kolonne 1 – Inndelingstilskot

Inndelingstilskotet blir gjeve som kompensasjon til kommunar som sluttar seg saman. Inndelingstilskotet blir fryst reelt i 15 år, og blir deretter trappa gradvis ned over 5 år. Inndelingstilskotet blir omtalt nærare i innleiinga og i kapittel 18.2 i St.prp. nr. 64 (2001–2002) *Om lokaldemokrati, velferd og økonomi i kommunesektoren 2003*. I 2017 blir det gjeve inndelingstilskot til åtte kommunar (kommunane Re, Vindafjord, Aure, Bodø, Kristiansund, Inderøy, Harstad og Sandefjord).

Inndelingstilskotet til Re kommune er prisjustert, og redusert med 20 pst. frå 2016. Inndelingstilskotet til Sandefjord kommune er lik to basistilskot, som kommunane mista som følge av samanslåinga, som i 2016 utgjorde 26,4 mill. kroner. Beløpet er prisjustert i 2017, slik at inndelingstilskotet til Sandefjord kommune er 27,0 mill. kroner i 2017. Inndelingstilskotet for dei øvrige kommunane er prisjustert frå 2016.

Kolonne 2 – Trekk Nannestad og Ullensaker

Nannestad og Ullensaker har i perioden 1993–2008 motteke finansieringsbistand i form av skjønsmidlar i samband med etableringa av Oslo Lufthamn, Gardermoen. Totalt har kommunane motteke 735,5 mill. kroner, der 387 mill. kroner skal betalast tilbake i 20 like store avdrag frå og med 2009. Dette blir gjort ved eit trekk i rammetilskotet til Nannestad og Ullensaker på høvesvis 7,43 og 11,92 mill. kroner årleg t.o.m. 2028. Trekket er ikkje prisjustert.

Kolonne 3 – Helsestasjons- og skulehelseteneste

Regjeringa vil ytterlegare styrkje helsestasjons- og skulehelsetenesta, inkludert jordmortenesta. 50 mill. kroner av veksten i kommunesektorens frie inntekter er grunngeve med ei styrking av desse tenestene. I statsbudsjettet for 2014 blei det løyvd 180 mill. kroner innanfor veksten i dei frie inntektene, og beløpet blei auka til 455 mill. kroner i 2015 og til 667,7 mill. i 2016. For 2017 utgjer satsinga på denne tenesta til saman 734,4 mill. kroner. Midlane er føreslått fordelt til kommunane basert på talet på innbyggjarar i alderen 0–19 år, med eit minstenivå på 100 000 kroner per kommune.

Kolonne 4 – Utdanning av deltidsbrannpersonell

For å leggje til rette for å auke utdanninga av deltidsbrannpersonell, er 38,9 mill. kroner av rammetilskotet fordelt særskilt til kommunar ut frå talet på deltidsbrannpersonell i kvar kommune. Der det er vertskommunesamarbeid om brannvesen er midla fordelte til vertskommunen. Regjeringa legg til grunn at vertskommunane sørgjer for at midlane kjem alle kommunane i samarbeidet til gode.

Kolonne 5 – Uttrekk – avgiftslette differensiert arbeidsgjevaravgift

31 kommunar fekk avgiftslette som følgje av revidering av ordninga med differensiert arbeidsgjevaravgift frå 1. juli 2014. Kommunane blei difor trekte i rammetilskotet i 2015 tilsvarende beløpet dei fekk i avgiftslette (sjå Prop. 1 S (2014–2015) for ein nærare omtale av saka). Som varsla i kommuneproposisjonen for 2016 (Prop. 121 S (2014–2015)) vil trekket bli trappa ned over fem år. Trekket frå 2015 er prisjustert og trappa ned med 40 pst.

Kolonne 6 – Korreksjon barnevern, uttrekk Oslo kommune

I 2015 ble det lagt inn 160 mill. kroner i rammetilskotet som følgje av auka kommunal medfinansiering av det statlege barnevernet. Denne endringa gjaldt ikkje Oslo kommune, som òg har ansvaret for den statlege delen av barnevernet i Oslo.

Sidan det ikkje er mogleg å halde Oslo utanfor fordelinga av midlane, fekk Oslo om lag 26 mill. kroner gjennom kostnadsnøkkelen til dette formålet i 2015. For at Oslo skal gå i null blei det lagt inn ein korreksjon på -26,012 mill. kroner i tabell C i 2015. Trekket for 2017 er prisjustert.

Kolonne 7 – Forsøk med ny oppgave- og ansvarsdeling i barnevernet

Barne- og likestillingsdepartementet har frå 1. april sett i verk eit forsøk med ny oppgave- og ansvarsdeling mellom kommunalt og statleg barnevern. Løyvinga til forsøket er i 2017 73,345 mill. kroner, som er fordelt på dei kommunane som deltek i forsøket. Utrekninga som ligg til grunn for fordelinga blei gjort før forsøkskommunane vart valde ut, og er den same som ligg til grunn for fordelinga i 2016. Beløpet er prisjustert frå 2016, og justert for heilårsverknaden i 2017.

Kolonne 8 – Forsøk med statleg finansiering av omsorgstenestene

Frå 1. mai 2016 er det sett i verk eit forsøk med statleg finansiering av omsorgstenestene. Forsøket inneber at dei seks kommunane som deltek i forsøket i perioden 1. mai 2016 til 30. april 2019 får tilskot til omsorgstenester som statlege tilskot eller eit øyremerkt tilskot, og ikkje som rammetilskot. Kommunane som deltek i forsøket får derfor eit trekk i rammetilskotet i 2017 på til saman 1 015,378 mill. kroner.

Kolonne 9 – Tilskot til frivilligsentraler

Regjeringa foreslår å innlemme tilskot til frivilligsentraler i rammetilskotet til kommunane i 2017, og 131 mill. kroner blir foreslått flyttet frå kap. 315, post 71 Tilskudd til frivilligsentraler til rammetilskotet i 2017. I tillegg til beløpet som blir innlemma vil ytterlegare 20 mill. kroner bli fordelt til dette formålet i 2017. Totalt 151 mill. kroner blir fordelt med særskilt fordeling i 2017 til frivilligsentraler i 2017. Fordeling tar utgangspunkt i fordelinga av det øyremerkete tilskotet i 2016.

Kolonne 10 – Sum saker med særskild fordeling

Summen av kolonnane 1–9. Talet er nytta i tabell 2-k, kolonne 3. Tilskota er lagde inn i inntektssystemet, og er i hovudsak haldne utanfor utrekninga av inntektsgarantiordninga.